
ԳԻՏՆԱԿԱՆ ԿԵՄԴԱՐՅԱ ՈՒՂԻՆ



Հայաստանի գիտական հասարակայնությունը նշեց հիշարժան հոբելյան: Լրացավ մեր ժամանակների անվանի պատմաբան, ՀՀ ԳԱԱ թղթակից անդամ, ՀՀ ԳԱԱ պատմության ինստիտուտի տնօրեն Աշոտ Մելքոնյանի ծննդյան 50-ամյակը:

Լայն է Ա. Մելքոնյանի գիտական հետաքրքրությունների և նախասիրությունների շրջանակը: Տարիներ և տասնամյակներ շարունակ նա զբաղվել է Հայաստանի պատմական ժողովրդագրության, Ջավախքի պատմության, հայ-վրացական հարաբերությունների, Հայկական հարցի և հայոց ցեղասպանության հիմնահարցերի զանազան շերտերի ու ենթաշերտերի ուսումնասիրությամբ:

Արգասաբեր է Աշոտ Մելքոնյանի կեսդարյա ուղին: Ծնվել է 1961 թ. փետրվարի 16-ին Ախալքալաքում, փաստակաշատ լրագրող և հանրային գործիչ Ադասի Մելքոնյանի ընտանիքում: Միջնակարգ կրթությունը ստացել է ծննդավայրում, 1977 թ. ոսկե մեդալով ավարտել է Ախալքալաքի Դ. Դեմիրճյանի անվան հանրակրթական օջախը: Նույն թվականին ընդունվել է Երևանի պետական համալսարանի պատմության ֆակուլտետ և գերազանցության դիպլոմով ավարտել 1982-ին: 1982-1985 թթ. ուսումնառությունը շարունակել է ԵՊՀ ասպիրանտուրայում՝ որպես վերոնշյալ բուհի հայոց պատմության ամբիոնի ասպիրանտ: 1986-ից աշխատանքի է անցել Հայաստանի գիտությունների ազգային ակադեմիայի պատմության ինստիտուտում նախ՝ որպես լաբորանտ, ապա՝ գիտաշխատող, գիտական քարտուղար և գիտական հարցերի գծով փոխտնօրեն:

Ա. Մելքոնյանը 1989-ին հաջողությամբ պաշտպանում է ատենախոսություն՝ «Էրզրումի նահանգի հայ ազգաբնակչությունը 19-րդ դարի առաջին երեսնամյակին» թեմայով, և ստանում պատմական գիտությունների թեկնածուի գիտական աստիճան: Նա հաջողությամբ պաշտպանել է դոկտորական ատենախոսություն՝ «Ջավախքը 19-րդ դարում և 20-րդ դարի առաջին քառորդին» թեմայով: Նույն թվականին Ա. Մելքոնյանը զբաղեցնում է ՀՀ ԳԱԱ

պատմության ինստիտուտի տնօրենի պաշտոնը, իսկ երկու տարի անց՝ 2004 թ., նրան շնորհվում է պրոֆեսորի գիտական կոչում: 2006 թ. ընտրվել է ՀՀ ԳԱԱ թղթակից անդամ:

Հանրաճանաչ գիտնականն առ այսօր հրապարակել է տասնմեկ գիտական ուսումնասիրություններ ու գրքեր, ավելի քան 150 գիտական հոդվածներ, որոնք լույս են տեսել Հայաստանում և նրա սահմաններից դուրս՝ Ռուսաստանում, Անգլիայում, Հունգարիայում, Ֆրանսիայում, Եգիպտոսում, ԱՄՆ-ում, Լիբանանում, Իրանում, Արգենտինայում, Վրաստանում՝ հայերեն, անգլերեն, հունգարերեն, ֆրանսերեն, վրացերեն, իսպաներեն, պարսկերեն թուրքերեն, արաբերեն լեզուներով: 1990-ական թթ. վերջերից մինչև օրս Ա. Մելքոնյանը ուշագրավ զեկուցումներով հանդես է եկել միջազգային բազմաթիվ գիտաժողովներում, ներառյալ՝ Գերմանիայում, ԱՄՆ-ում, Ռուսաստանում, Ֆրանսիայում, Եգիպտոսում, Իրանում, Հունգարիայում, Կիպրոսում, Լիբանանում և այլուր:

Ա. Մելքոնյանը բանախոսություններով ու ելույթներով հանդես է եկել արտերկրի բազմաթիվ քաղաքներում՝ ինչպես սփյուռքահայ, այնպես էլ օտարազգի լսարանների առջև: Նա, գիտական բազմազբաղ աշխատանքին զուգահեռ, վարել է նաև մանկավարժական ակտիվ ու եռանդուն գործունեություն. «Հայոց պատմություն» առարկան դասավանդում է ԵՊՀ-ում, ԳԱԱ մագիստրատուրայում, ժամանակին դասավանդել է նաև մի շարք այլ բուհերում: 2004 թ. հունիսից մինչև 2006 թ. դեկտեմբեր համատեղության կարգով զբաղեցրել է Երևանի Մ. Հերացու անվան պետական բժշկական համալսարանի հասարակական գիտությունների ամբիոնի վարիչի պաշտոնը: Բազմիցս եղել է տարբեր բուհերի, այդ թվում՝ Երևանի Խ. Աբովյանի անվան պետական մանկավարժական, Արցախի պետական համալսարանների, Գյումրիի պետական մանկավարժական ինստիտուտի պատմության ֆակուլտետների պետական քննական հանձնաժողովների նախագահ:

Ներկայումս պրոֆեսոր Ա. Մելքոնյանը գլխավորում է ՀՀ ԳԱԱ պատմության ինստիտուտի գիտական և նույն ինստիտուտում գործող «004 Հայոց պատմություն» մասնագիտական խորհուրդները, միաժամանակ ԵՊՀ խորհրդի, ՀՀ ԳԱԱ արևելագիտության ինստիտուտի, Երևան քաղաքի պատմության թանգարանի գիտական խորհուրդների և մի շարք գիտական հանդեսների («Լրաբեր հասարակական գիտությունների», «Բանբեր Հայաստանի արխիվների», «Վեմ», «Կանթեղ», «Տարեգիրք» և այլն) խմբագրական խորհուրդների անդամ է: Խորագիտակ գիտնականը ոչ միայն մեր պատմական բնօրրանի հայոց դարավոր պատմության հերոսական ու ողբերգական էջերի անաչառ գիտական ուսումնասիրությանն է լծված, այլև հանրագիտարանային ու հրապարակախոսական հոդվածների, դպրոցական ու բուհական ձեռնարկների միջոցով այն հանրամատչելի կերպով ներկայացնում է հայրենի և արտերկրի լայն հասարակայնությանն ու հատկապես պատանի ու երիտասարդ սերնդին: Այս առումով նրա հետազոտական աշխատանքների աշխարհագրությունն ընդգրկում է գրեթե ամբողջ պատմական Հայաստանը:

Ա. Մելքոնյանը, 2010 թ. սկսած, ՀՀ պաշտպանության նախարարության հետ համագործակցության շնորհիվ, հայոց պատմության հիմնահարցերի շուրջ ուշագրավ դասախոսությունների շարք է իրականացնում հայկական բանակում՝ ճշմարիտ հայրենագիտությամբ լիցքավորելով հայ սպաներին ու զինվորներին:

Չի կարելի շրջանցել նրա հետևողական պայքարը պատմության թուրք ու թուրքամետ կեղծարարների դեմ: Հատկապես հիմնավոր էր գիտնականի սկզբունքային և իրատեսական դիրքորոշումը հայոց ցեղասպանության ուրացման երևույթի դեմ՝ որտեղ, ինչ ձևով և ում կողմից էլ այն արտահայտված լիներ:

Այդ նպատակին նա ծառայեցնում է ամեն ինչ՝ գիտական ներուժն ու հասարակական-քաղաքական բազմաբովանդակ գործունեությունը, սեփական հետազոտական աշխատանքն ու գիտակազմակերպչական լայն շառավղի իր առօրյան։ Նշանավոր պատմաբանի աշխատությունները ձեռք են բերել հասարակական մեծ հնչեղություն և արժանացել տարբեր կարգի մրցանակների։ Նրա «Էրզրում» (Ե., 1994 թ.) պատմաժողովրդագրական ուսումնասիրությունը և Արևմտյան Հայաստանի գավառներին ու բնակավայրերին նվիրված 30 հոդվածներն արժանացել են «Հայաստան» համահայկական հիմնադրամի գլխավոր մրցանակին, իսկ «Ջավախքը 19-րդ դարում և 20-րդ դարի առաջին քառորդին» (Ե., 2003 թ.) աշխատությունը՝ նշանավոր արևելագետ և ազգային-հասարակական գործիչ Գուրգեն Մելիքյանի հիմնադրած «Քաջաթաղի բազմազավակ ընտանիքներ» հիմնադրամի դրամաշնորհին, նաև «Թեքեյան» մշակութային միության «Հայկաշեն Ուզունյան» մրցանակին։

Ա. Մելքոնյանի հեղինակությամբ լույս տեսավ «Նյութեր Ախալցխայի ու Ախալքալակի դպրոցների պատմությունից (19-րդ դար – 20-րդ դարի սկիզբ)» (Ե., 2005 թ.) աշխատությունը։ Վլ. Ղազախեցյանի համահեղինակությամբ նա կազմել ու խմբագրել է «Հայաստանը պետական գաղտնի փաստաթղթերում (1922-1929 թթ.)» (Ե., 2008 թ.) ժողովածուն։ Նրա և Էդ. Դանիելյանի համահեղինակությամբ, դասական ուղղագրությամբ, 2008 թ. լույս տեսավ «Հայոց պատմություն. հնագույն ժամանակներից մինչև մեր օրերը» ուսումնական ձեռնարկը։

Հայ պատմաբան Ա. Մելքոնյանի գիտահասարակական գործունեության կարևոր կողմերից են հայոց պատմական բնօրրանին՝ Արևմտահայաստանին նվիրված ուխտագնացությունները, դրանց խոր իմաստավորմամբ ծնված ֆիլմերն ու ճանապարհորդական նոթերը։ Նա յոթ անգամ ուխտագնացություն է կատարել Արևմտյան Հայաստան և հայրենասեր գիտնականի, հմուտ տեղագրագետի, քարտեզագրի, պատմագրաաշխարհագետի մասնագիտական իմացությամբ շրջել է հայոց հազարամյա հայրենիքի անհետացած ու դեռ կանգուն գյուղերով և քաղաքներով, ակնածանքով ուսումնասիրել հայոց պատմական անցյալի հուշարձաններն ու հիշատակարանները։ Մեր պատմական հայրենիքն իր անցյալի էջերով ու ներկայով արտացոլված է Ա. Մելքոնյանի հեղինակած «Գարոտի էրզիր» (2006 թ.), «Արարատ. Հայոց անմահության խորհուրդը» (2008 թ.) հեռուստատեսային վավերագրական ֆիլմերում։ Խորհրդանշական է այն հանգամանքը, որ Սևրի պայմանագրի կնքման օրը՝ օգոստոսի 10-ին (2007 թ.), նա լեռնագնացների խմբով նվաճել է Արարատ լեռան գագաթը։

Միանգամայն արդարացի և օրինաչափ է, որ գիտամանկավարժական, հասարակական եռանդուն, ազգօգուտ գործունեության համար ականավոր գիտնականն արժանացել է մի շարք բարձր պարգևների ու մեդալների։ ՀՀ Նախագահի հրամանագրով 2003 թ. պարգևատրվել է «Մովսես Խորենացի» բարձրագույն մեդալով։ 2005 թ. հայոց ցեղասպանության 90-րդ տարելիցի միջոցառումներին ակտիվորեն մասնակցելու համար պարգևատրվել է ՀՀ վարչապետի և «Մանկավարժական համալսարան» հուշամեդալներով։ Վերջերս նրան շնորհվեց նաև ՀՀ պաշտպանության նախարարության ոսկե մեդալ։ Ա. Մելքոնյանի բարոյականային և հայրենասիրական բարձր հատկանիշների շնորհիվ է, որ հանրապետության պատմագիտական գլխավոր հիմնարկում՝ ԳԱԱ պատմության ինստիտուտում, տիրում է բարոյահոգեբանական միանգամայն առողջ ու ստեղծարար

մթնոլորտ, որ համագործակցության առողջ հիմքեր է ստեղծել հայ պատմաբանների համար՝ թե հայրենիքում, թե արտերկրում:

Ա. Մելքոնյանի գիտական, մանկավարժական, հասարակական-լուսավորական գործունեության մասին բարձր կարծիք են հայտնել հայագգի և օտարագգի բազմաթիվ գիտնականներ, պատմաբաններ, հասարակագետ-քաղաքագետներ, լրագրողներ ու խմբագիրներ, պետական ու հասարակական գործիչներ:

Անվանի գիտնական և հայրենանվեր մտավորական Աշոտ Մելքոնյանը ստեղծագործական ուժերի բոլորն ծաղկման ու վերելքի շրջանում է, ուստի նրան մաղթենք աշխատանքային հաջողություններ, գիտական, կազմակերպչական, ստեղծագործական անդադրում ջանքեր ու որոնումներ՝ ի հաստատումն Հայաստան երկրի և հայ ժողովրդի:

ԿԱՐԱՊԵՏՅԱՆ Ա. Հ.

Պատմական գիտությունների թեկնածու